

HALL, BENJAMIN Arglwydd Llanofar (1802-1867), gwleidydd a diwygiwr

PDF Generated on: Mon, 05 Sep 2022 17:33:31 +0000

<https://yba2-prawfweb-prawfdata.llgc.org.uk/article/c11-HALL-BEN-1802>

Enw: Benjamin Hall

Dyddiad geni: 1802

Dyddiad marw: 1867

Priod: Augusta Hall (née Waddington)

Plentyn: Augusta Charlotte Elizabeth Jones (née Hall)

Rhiant: Charlotte Hall (née Crawshay)

Rhiant: Benjamin Hall

Rhyw: Gwryw

Galwedigaeth: gwleidydd a diwygiwr

Maes gweithgaredd: Gwleidyddiaeth a Mudiadau Gwleidyddol; Gwasanaethau Cyhoeddus a Chymdeithasol, Gweinyddiaeth Sifil

Awdur: Marion Löffler



Ganwyd Benjamin Hall, Arglwydd Llanover 1af, yn Llundain ar 8 Tachwedd 1802, yr hynaf o bedwar mab y diwydiannwr [Benjamin Hall](#) (1778-1817) a'i wraig Charlotte (ganwyd Crawshay, 1784-1839). Symudodd y teulu i stad Aber-carn yn Sir Fynwy pan oedd Benjamin Hall yn chwe mlwydd oed. Mynychodd Ysgol Westminster o 1814 tan 1820, pan ymunodd â Choleg Christ Church, Rhydychen. Gadawodd Rhydychen ym 1821 heb gymryd gradd.

Yn fuan wedyn, digwyddodd dau beth a weddnewidiodd ei fywyd. Yn ystod taith o gwmpas Lloegr a'r Alban ym 1822 ymwelodd â phentref New Lanark a sefydlasid gan [Robert Owen](#), gan ddysgu am y cysylltiad rhwng amgylchiadau byw'r dosbarth gweithio a'u moesau, a magu'r awydd i ddiwygio cymdeithas a'i gwnâi yn wleidydd Rhyddfrydol llwyddiannus. Drwy ei briodas ag [Augusta Waddington](#), Arglwyddes Llanover, ar 4 Rhagfyr 1823, daeth yn aelod o gylch dylanwadol o noddwyr yr iaith Gymraeg a'i diwylliant a gyfunodd genedlaetholdeb diwylliannol a Phrotestaniaeth selog.

Etholwyd ef yn AS Rhyddfrydol dros fwrdeistrefi Mynwy ym 1831, collodd ei sedd ar betisiwn, ond fe'i hetholwyd eto ym 1832. Gwasanaethodd fel aelod dros fwrdeistrefi Mynwy tan 1837, pan wahoddwyd ef i sefyll dros Marylebone. Bu'n AS llwyddiannus iawn yno tan 1859, gan areithio'n aml yn Nh 'r Cyffredin. Cyhoeddwyd ei *A Letter to his Grace of Canterbury* ym 1850, araith a gafodd effaith fawr ar y ddadl dros ddiwygio'r Eglwys. Fe'i gwnaethpwyd yn farwnig ym 1838, a'i apwyntio yn Llywydd y Bwrdd Iechyd ym 1854. Yn sgil ei weithgarwch yn ystod yr epidemig colera a ymledodd drwy Llundain bythefnos wedi ei apwyntiad, a'i ymgyrch egniol i yrru drwy'r senedd ddeddf iechyd a arweiniodd at sefydlu Bwrdd Gweithiau'r Brifddinas (rhagflaenydd Cyngor Sir Llundain), daeth i sylw'r Frenhines ac fe'i penodwyd yn Brif Gomisinydd Gweithiau ym 1855, swydd a ddaliodd tan 1858. Ym 1855 ymgyrchodd yn llwyddiannus dros agor parciau Llundain i'r cyhoedd ar ddyddiau Sul er mwyn gwella iechyd y bobl gyffredin, a mwynhawyd y cynllun gan filoedd o bobl, er gwaethaf protestiadau gan Sabathyddwyr. Goruchwyliodd gastio a gosodiad cloc mawr Westminster yn ystod ei gyfnod yn y swydd, a oedd hefyd yn cwmpasu ailadeiladu'r Senedd-dai, ac enwyd y cloc yn 'Big Ben' i gydnabod ei gyfraniad, ond hefyd y ffaith ei fod yn ddyn tal iawn, 6'7 yn ôl rhai. Cafodd ei urddo'n arglwydd ar 29 Mehefin 1859 yn ystod ail dymor Palmerston, i brotestiadau gan y sawl a'i hystyriai'n radical gwleidyddol, daeth yn Farwn Llanofar o Llanofar ac Aber-carn, a chymerodd ei sedd yn Nh 'r Arglwyddi.

Drwy ei briodas ag [Arglwyddes Llanofar](#), daeth yn rhan o gylch o noddwyr yr iaith Gymraeg a'i diwylliant, er bod y pryder am fuddiannau crefyddol siaradwyr Cymraeg, yn enwedig cyflenwi clerigwyr a fedrai'r Gymraeg, yn flaenoriaeth iddo ef, yn fwy nag iddi hi efallai. Dyma'r cefndir i'w ddadl gyda'r [esgob Connop Thirlwall](#) ar gyflwr yr Eglwys yn esgobaeth Tyddewi. Bu'n un o Gymry blaenllaw Llundain a gyfarfu ym 1842 i drafod noddi gwasanaethau'r Eglwys yn y Gymraeg yn y brifddinas. Wedi codi'r arian angenrheidiol i brydlesu eglwys St Ethelreda a thalu am glerigwr, cynhaliwyd gwasanaeth Cymraeg cyntaf Eglwys Esgobaethol Ely Place, Holborn, ym mis Rhagfyr 1843, gan barhau tan 1874. Yn ei gartref yn Aber-carn, adeiladodd eglwys newydd sbon i gynnal gwasanaethau Cymraeg, a gysegrwyd ym 1854. Delweddir symlrwydd bywyd beunyddiol a thueddiadau dirwestol Arglwydd ac [Arglwyddes Llanofar](#) gan adroddiad cyfoesol am graffiti ar borth eu hystad, 'A park without deer, a house without beer, Sir Benjamin Hall lives here'.

Yn heliwr brwd drwy gydol ei oes, dioddefodd Benjamin Hall sawl damwain farchogaeth, a chollodd lygad mewn damwain saethu ym 1848. Bu farw yn Llundain ar 27 Ebrill 1867 o diwmor yn ei wyneb a achoswyd gan ddamwain saethu ym mis Tachwedd 1866. Claddwyd ef ym meddrod y teulu ger eglwys St Bartholomew, Llanofar.

Awdur

Marion Löffler

Ffynonellau

David Williams, '[HALL, BENJAMIN](#)', *Y Bywgraffiadur Cymreig hyd 1940* (1953)

Helen Forder, *High Hats and Harps. The Life and Times of Lord and Lady Llanover* (2012)

Maxwell Fraser, 'Sir Benjamin Hall (afterwards Lord Llanover), 1802-1867', *Presenting Monmouthshire* 8 (1959), 7-10

Maxwell Fraser, '[Sir Benjamin and Lady Hall at Home in the 1850s Part I](#)', *Cylchgrawn Llyfrgell Genedlaethol Cymru* 14/3 (1966), 285-300

Maxwell Fraser, '[Sir Benjamin and Lady Hall at Home in the 1850s Part II](#)', *Cylchgrawn Llyfrgell Genedlaethol Cymru* 14/4 (1966), 437-50

Maxwell Fraser, '[Sir Benjamin and Lady Hall in the 1840s Part I](#)', *Cylchgrawn Llyfrgell Genedlaethol Cymru* 14/1 (1965), 35-52

Maxwell Fraser, '[Sir Benjamin and Lady Hall in the 1840s Part II, 1846-9](#)', *Cylchgrawn Llyfrgell Genedlaethol Cymru* 14/2 (1965), 194-213

Maxwell Fraser, '[Lord Llanover \('Big Ben'\) in London](#)', *Trafodion Anrhydeddus Gymdeithas y Cymmrodorion* Session 1964/Part I (1964), 69-92

Maxwell Fraser, '[Young Mr and Mrs Hall, 1823-30](#)', *Cylchgrawn Llyfrgell Genedlaethol Cymru* 13/1 (1963), 29-47

Maxwell Fraser, '[Benjamin Hall's Youth, 1803-1823](#)', *Cylchgrawn Llyfrgell Genedlaethol Cymru* 12/3 (1962), 250-64

Maxwell Fraser, 'Benjamin Hall (afterwards Lord Llanover) and the Monmouthshire Boroughs, 1831-37', *Presenting Monmouthshire* 12 (1961), 8-20

Maxwell Fraser, '[The Waddingtons of Llanover, 1791-1805](#)', *Cylchgrawn Llyfrgell Genedlaethol Cymru* 11/4 (1960), 285-329

Mair Elvet Thomas, *Afiath yng Ngwent: Hanes Cymdeithas Cymreigyddion y Fenni* (Caerdydd 1978)

Mair Elvet Thomas, *The Welsh Spirit of Gwent* (Cardiff 1988)

Darllen Pellach

Coflein: [Llanover House](#)

Adam Coward, [For Whom Does the Bell Toll?](#), blog Rambles and Studies in Welsh History, 21 Awst 2017

[Genealogical memoranda relating to the families of Herbert & Hall \(1896\)](#)

Erthygl Wicipedia: "[Benjamin Hall](#)"

Dolenni Ychwanegol

VIAF: [12206617](#)

Wikidata: [Q2568971](#)

Dyddiad cyhoeddi: 2016-06-08

Hawlfraint Erthygl: <http://rightsstatements.org/page/InC/1.0/> 

Mae'r Bywgraffiadur Cymreig yn cael ei ddarparu gan Lyfrgell Genedlaethol Cymru a Chanolfan Uwchefrydiau Cymreig a Cheltaidd Prifysgol Cymru. Mae ar gael am ddim ac nid yw'n derbyn cymorth grant. Byddai cyfraniad ariannol yn ein helpu i gynnal a gwella'r wefan er mwyn i ni fedru parhau i gydnabod Cymry sydd wedi gwneud cyfraniad nodedig i fywyd yng Nghymru a thu hwnt.

Ewch i'n [tudalen codi arian](#) am ragor o wybodaeth.

